



6.3.| LÈS NUKLEO – SIGUI

Na e punto akí den e seshon, e enfoke ta kambia pa futuro. E final di e programa por ta un momentu hopi emoshonal pa e partisipantenan. Hopi por sinti ansiedat ora ta trata e siguiente kapítulo di nan bida. Ta importante pa duna famianan algun sosten i enkurashamentu.

E siguiente aktividatnan ta yuda famianan identifiká maneranan pa sigui sostené otro.

“Sòpi di Piedra” ta un kuenta tokante konstruí un komunidad ku ta kompartí ku e famianan pa yuda nan tuma responsabilidad di nan mes abilidatnan, konosementu i esun di e otro!

Dependiendo di kuantu tempu tin disponibel i si tin un selebrashon separá planiá, bo por konta e historia akí durante e selebrashon di komunidad.

KUENTA – SÒPI DI PIEDRA

(kuento tradishonal manera nará pa Jamie McLaren Lachman)

Un tempu tabatin un pueblo bunita. E hendenan di e pueblo aki semper tabata kontentu pasobra nunca nan no tabatin mester di nada. Nan tabatin bestia, fruta i bèrdura, ya ku nan pueblo tabata un pueblo hopi fértil. Nunca nan a konosé sufrimentu.

Sinembargo, despues di algun tempu tabatin sekura. No tabatin áwaseru mas i nan bestianan tabata muri. Tempu a bira difísil pasobra awor tabatin hamber den e pueblo. E hendenan a stòp di papia ku otro pasobra tur hende tabata enfoká riba nan propio problemanan.

Un dia un señora bieu a bin e pueblo akí kargando un wea grandi pretu riba su kabes i un saku chikí maron. Ora ela yega meimei di e pueblo, el a pone e wea grandi pretu riba suela i a sinta banda di dje pa tuma un sosiegu. Niun hende no a mira e muhé akí, ku eksepsion di un mucha hòmber chikí ku tabata hunga pafó e dia ei.

Ora e mucha hòmber a mira e señora bieu akí, el a puntr'é "Kiko bo ta hasiendo ku e wea pretu grandi ei?"

"Mi ta bai traha un tiki Sòpi di Piedra!" e señora bieu a kontestá. Esaki a konfundí e mucha hòmber. Ken a yega di tende di un kos manera Sòpi di Piedra?

Komo ku e tabata un mucha hòmber curioso i semper yen di pregunta, el a puntra: "Mi por yuda bo por fabor?"

E señora bieu tabata mashá kontentu ora ku el a pidi pa yud'é. "Naturalmente, bo por! Bai buska un tiki awa i piki un algun palu, mi yu," el a bisa.

Pues, e mucha hòmber a piki algun palu den e mondi ku ta djis serka ei banda. Miéntas e señora bieu tabata okupá ta sende e kandela, el a baha bai na e riu pa buska un tiki awa.

Pa ora e mucha hòmber a yega bèk ku awa, e señora bieu tabatin un kandela grandi i kayente sendé

El a pone e wea grandi pretu riba kandela i a basha e awa aden. Despues el a habri su saku chikí maron i a saka un piedra blanku rondó i briante. El a pon'é den e wea grandi pretu i a kuminsá drej, kantando un kantika bieu ku nan sa kanta ora di kushiná.

Den un ratu di ora, e awa a kuminsá herebé. E señora bieu a lembe su lepnan i a bisa e mucha hòmber, "Mmmmm...esaki ta bai ta un dushi wea di Sòpi di Piedra."

No a tarda muchu ku e otronan a kuminsá nota e kandela ta kima meimei di e pueblo. Un pa un, nan a bandoná nan kas pa wak kiko tabata pasando.

"Kiko ta pasando akí?" un hòmber a puntra. E mucha hòmber a kontestá: "E ta kushiná Sopi di Piedra!"

Esnan ku tabata einan a interkambiá mirada komo si fuera nunca nan no a yega di tende di algu asina. Sòpi di Piedra?

E notisia a plama lihé i den henter e pueblo. Tur e habitantenan di e pueblo a sali for di nan kas pa mira nan mesun wowo, e señora bieu loko akí i su Sòpi di

Piedra ku. Segun ku e hendenan tabata yegando, e señora bieu a sigui drei e wea miéntras e tabata saka un zonido.

Ora el a nota ku tabatin hopi hende reuní, el a stòp di drei i a purba e sòpi poko awa. "Mmmmmmm... Esaki ta bai ta e sòpi di mas dushi. E djis falta algu. Si solamente tabatin algun siboyo..."

Un señora tabatin algun siboyo bieu ku e tabata warda. Nan tabata chikitu i tur di krùl pero tòg bon pa kome. "Mi tin algun siboyo," el a ofresé. El a bai buska nan na su kas, kòrta nan i a agregá nan na e wea grandi pretu ku tabata kushi.

Despues di un ratu mas, e señora bieu a purba e sòpi atrobe. "Si, e sòpi akí ta bai ta asina bon. Pero e falta algu.... Si solamente tabatin djis un tiki mas...."

"Bèrdura!" un bos for di e multitud a bisa, "E mester di mas bèrdura. Mi tin un tiki spinazí. E no ta muchu pero bo por us'é." Un otro persona a trese un par di batata bieu. Un otro hende tabatin un kolo. Un otro, konofló. Wòrtel. Un pampuna. Salu. Un galiña bieu i flaku. Algun chili. Speserei.

[Na e punto akí, e kontadó di kuenta por pidi hende sugerensia kiko pa hinka den e sòpi]

E holó di e sòpi a yena e pueblo. E tabata kòrda hende di e tempu di ántes. Nan a kuminsá papia ku otro, interkambiando kuenta i notisia, asta chiste. A bolbe tende harimentu pa promé biaha den hopi año.

Porfin, e señora bieu a stòp di drei. El a purba e sòpi i a deklará ku un brio den su wowo, "E Sòpi di Piedra akí ta kasi kla. I asina tantu pa kome. Mi ta puntra mi mes si boso por yuda mi kab'é por fabor."

Tur hende a bai bèk nan kas i a trese tayó hundu i kuchara. Ounke tabatin asina tantu hende, tabatin nèt sufisiente pa kada persona. Nan a kome e sòpi te ora nan tur a yena. I e tabata e Sòpi di Piedra di mas dushi ku nan a yega di purba.

Ora nan a kaba, e habitantenan di e pueblo a saka nan tambú i otro instrumentonan musikal i a kuminsá kanta kantika i baila. Nan a kanta i baila te mardugá. Despues, e habitantenan di e pueblo a gradisí e muhé i a regresá nan kas kòmbersando ku otro. Un biaha mas, tabatin e zonido di harimentu i kantika den airu e anochi ei.

Segun ku e streanan di anochi a kuminsá bria, e señora bieu a keda su so meimei di e pueblo. El a kue e piedra blanku hinka den su saku chikí maron i a pone su wea grandi pretu riba su kabes. Sin bisa un palabra di despedida, e la kuminsá kana pokopoko riba e kaminda yen di bientu ku tabata hiba pafó di e pueblo.

Promé ku e por a bai, e mucha hòmber a mir'é i a kore bai serka dje. “Dikon bo ta bai?” el a puntra.

“Mi trabou akí ta kla,” e señora bieu a kontestá. “Pero nos mester di un hende manera abo pa yuda nos,” e mucha hòmber a bisa.

El a hinka man den su saku chikí maron i a entregá e mucha hòmber e piedra blanku. “Bo tin tur e ingredientenan ku bo mester pa traha Sòpi di Piedra.” Despues el a kana pokopoko riba e kaminda. E mucha hòmber a wak i a zuai te ora e no por a mir'é mas.

E habitantenan di e pueblo nunca mas a mira e muhé ei. Pero bida den e pueblo a sigui prosperá – den e mihó tempu i e pió tempu, nan no a pèrdè nan konekshon ku otro nunca mas segun ku nan a sigui traha e Sòpi di Piedra di mas dushi.

Fin.

DISKUSHON – MANTENE E MOMENTO

Hiba un diskushon pa yuda partisipantenan identifiká maneranan spesífiko den kua nan por sigui sostené otro. Preguntanan útil pa yuda kuminsá un diskushon por inkluí:

1. Kua ta algun di e ingredientenan ku nos tin den nos komunidad pa sigui sostené nos komo famianan?
2. Na ki maneranan nos por sigui sostené desaroyo di nos yunan i nos bida despues di e programa?

Bo por sugerí ku un hende ta tuma e responsabilidad pa pone e grupo huntu si e partisipantenan ta sugerí pa keda den kontakto òf sigui topa regularmente.

Pa gruponan di sosten di di personanan huntu den grup, ta importante pa identifiká lo siguiente:

- Persona (òf personanan) responsabel pa organisá e gruponan di sosten
- Desishon tokante kon pa topa: Ònlain? En persona? Si ta asina, unda i ki ora famianan por reuní?
- Un organisashon por duna yudansa?

REVISHON – TEPNAN PA KONTINUÁ SOSTEN:

1. Sigui praktiká tur e Tepnan di Edukashon Familiar ku bo a usa
2. Por tin otro famianan ku a hasi e programa di Mayor Konektà den bo barío.
Kuminsá bo mes Grupo di Sosten pa Mayor!
3. Siña ki servisio i sosten bo por haña den bo komunidad.